

**SISWATI LULWIMI LWASEKHAYA: LIPHEPHA I**  
**SISWATI HOME LANGUAGE: PAPER I**

Sikhatsi: 3 Emahora

100 emamaki

---

**TICONDZISO**

1. Leliphepha linetigaba letine nemakhasi la-16.
  2. Landzela ticondziso taleso naleso sigaba:  
  
SIGABA A: SIVISISO  
SIGABA B: SIFINYETO  
SIGABA C: TINKONDLO  
SIGABA D: TAKHI NETIMISO TEKUSETJENTISWA KWELULWIMI
  3. Phendvula yonkhe imibuto ngeSiswati lesemukelekile.
  4. Cala leso naleso sigaba ekhasini lelisha uphindze udvwebele ekugcineni kwaleso naleso sigaba.
  5. Shiya umugca emkhatsini wetimphendvulo takho.
  6. Caphela sipelingi (lupelomagama) nendlela lewakha ngayo imisho.
-

**SIGABA A SIVISISO****UMBUTO 1****1.1 Fundza lethekesthi bese uphendvula imibuto lelandzelako.****ITHEKSTHI A**

Themba watibuta angacedzi kutsi ingabe umhlaba uyini mbamba. Ume endlini yakhe, kuphambana imicabango ngemicabango engcondvweni yakhe. Umtimba wakhe uchuchisa kwemhlanga usemantini.

Ume njengesiphunti nje umntfwana waVilakati ubuka sitfombe lesi lapha etulu elubondzeni endlini yakhe yekuphumula. Phela indlu lengenato titfombe letinjalo ayibukeki ihlotjiswe ngalokwenele. Bahle! Bagezile naba bantfu labasesitfombeni. Nguletitfombe letikhuliswako, sifakwe engilazini. Sikukhanga ulapha khashane. Lentfombi ikuletimhlophe njengelichwa tembatfo, kusuka etulu kuyewushaya phasi eticatfulweni, nobe nje ticatfulo tingabonakali kahle! Enhloko ifake bucwebecwebe bebuhlalu lobuhamba nembali lenhle lemhlophe, itse nje caba etinweleni letishwilwe kamnandzi. Entsanyeni khona ifake buhlalu lobufana nemisebe yelilanga, butsi abucishe bugcwale yonkhe intsamo. Iyahlekelela intfombi, inebuso lobuveta ematinyo lamhlophe, busondzele kulobu belijaha leligcoke isudu leligolide ngembala. Lelijaha lingasekudla salentfombi. Ngephasi kwalesudu kwehla kancane lihembe lelimnyama, ngunankha langadzingi kufakelwa thayi. Nalelijaha tihlatsi tivakashela tindlebe. Yinhle bo nalenzawo lapho batsebula khona lesitfombe. Phela kusetjanini lobuluhlata cwe, eceleni kwelidamu lekubhukusha, kulelinye lemahhotela alapha endzaweni.

Uyadzela lobekakhona kulendumezulu yemshado walaba lababili labakulesitfombe, kwakukuhle kudzelile. Hhawu kwekwembatsa lobekulapho! Bekukhombisa nje kutsi bekulilanga lelikhulu futsi lelibalulekile. Nebantfu labebamenyiwe bekungulabakhetsiwe ngobe bebefika emnyango ehholweni lasehhotela, bakhiphe tincwajana labamenywe ngato, bese lona lowemukela letincwajana uyabendlulisa emnyango. Bewubona emasudu lasembili, besifazane bona ayiphatfwa, ngobe ngulowo abegcoke lokusematseni kutemfashini. Etigcokweni nakhona bewudzela ukholwe. Letinye betitimbenge, titodvwa letincane, ungatsi titawuwa kantsi cha! Ngatsi bekute lobekahamba ngetinyawo kulomshado, ngobe letimoti lebetilapha ngaphandle, bewungatsi kuhlange bosotigidzigidzi. Kute luhlobo lwemoti lesembili lebelungekho.

Ngekhatshi ehholweni, imbita beyiviwa ngelutsi. Esiteji sekukhala timfijoli telikhetselo. Lona welugatali Abelutsintsa ngatsi sewuyahlanya. Ngaphandle kwevakala, mfa ... mfa ... mfa ... ingani leto setimoti takalokusho letita namakoti. Wehla makoti. Wachamuka Jabu emnyango ngatsi lilanga liphuma, naloku nje besebuyinsimbi yelishumi.

Jabu abevele anesimilo lesihle, kangangobe wonkhe umuntfu walapha eMvutjini abebona kutsi unina akamange abola ematfumbu. Noba abebuya ekhaya lelime kahle akamange akutfwale enhloko loko. Inhlonipho yalabantfwana bonkhe bakaMdluli beyenta bantfu besigodzi batigcabhe ngabo. Phela uyise waJabu abengusomabhasi nasomakhumbi. Noba yena asashona nje kodvwa emabhasi akhe nemathekisi akhe solo asaphambana emgwacweni. Waphela-ke umshado, kwadliwa kwaba kuhle impela.

Emva kwekubuya kwebashadi ekuvakasheni, Themba wangenisa umkakhe kulesanuka pendi indlu khona lapha ePine Valley, eMbabane. Yayiyinhle indlu yakhiwe silumbi. Isho ngemagede lakhatimulako. Ayativula aphindze ativale. Imoti labehamba ngayo Themba beyivele itisho nje kutsi usebenta ebhange. Lokwaba buhlungu nje kwaba kutsi tihlobo taThemba atibonakalanga emshadweni. Nakusukunyiswa imindeni, kuThemba kwasukuma bangani bakhe kuphela. Kantsi phela kuyatiwa kutsi ekhaboThemba kusesigodzini saseMantabeni.

Wonkhe umuntfu abebona kutsi uwutfumele ligundvwane Jabu umendvo. Phela bashada nje boThemba, Jabu usandza kucedza enyuvesi, utfole tiku kutepolitiki netekuphatsa. Themba yena uneminyaka lemibili acedzile enyuvesi enta tifundvo tekubala timali nekugcina emabhuku ato timali. Kwajabulisa wonkhe umuntfu, kubona umfana lomncane asatsenge indlu lenkhulu kangaka, ahamba nangemoti lenhle. Themba bekatsi naphuma ekuseni, aya emsebentini baphume kanye kanye naJabu ampheleketele phela. Themba angene emotweni ayidvumise asondzele ngakumkakhe, bangane, bese itsi nyelele – nyelele – nyelele kancane iHundayi iyokuma egedeni, litivule, iphume, liphindze litivale. Jabu ngobe yena usengakasebenti solo usabhala tincwadzi tekucela umsebenti. Abeyimela imoti yemyeni wakhe ize iphume egedeni – sandla solo asiphakamise njalo amamatsekile. Ngisho sabuya emsebentini kwakuba njengasekuseni.

[Khulumani Sive: 57–60]

- 1.1.1 Themba ufikelwa ngiyo yonkhe lemicabango nje ukuliphi likamelo kulendlu yakhe? (1)
  - 1.1.2 Kabengele yini kutsi umbala wathayi logcokwe ngulelijaha lelisesitfombeni ungabonakali? (1)
  - 1.1.3 Lesitfombe satsatfwa kuwuphi umcimbi lapha kaboThemba? (1)
  - 1.1.4 Kushiwoni kuletheksthi ngendlu lesanuka pendi? Khetsa imphendvulo:
    - A Indlu lenuka pendi.
    - B Indlu lependwe kahle.
    - C Indlu lenapende lomuhle.
    - D Indlu lesaseyinsha. (1)
  - 1.1.5 Uyavumelana yini nalombono wekutsi ticatfulo talentfombi betimhlophe? Sekela imphendvulo yakho. (2)
  - 1.1.6 Tibitwa ngekutsini letincwajana lebekungenwa ngato ehholweni? Chaza. (2)
  - 1.1.7 Umbhali ushoni ngaleligama lelidvwetjelwe kulomusho longentasi? Sekela imphendvulo yakho. (2)
- Bewungatsi kuhlange bosotigidzigidzi.
- 1.1.8 Kwabangelwa yini kutsi uyise waJabu angabi khona kulomcimbi? (2)

- 1.1.9 Uncishiswe kanjani umsebenti wekuphekela bantfu kulomcimbi wakaVilakati nawubuka indzawo lowentelwe kuyo? Chaza. (2)
- 1.1.10 Kuletheksthi kutsiwa Jabu usebentaphi? Sekela imphendvulo yakho. (2)
- 1.1.11 Nawufundza letheksthi lengenhla ngabe yini umsebenti wetitfombe letilengiswa emabondzeni ekhatsi etindlini? Bhala kubili. (2)
- 1.1.12 Ngekucabanga kwakho atitanga leni tihlobo taThemba kulomshado wakhe? (2)

**[20]**

## 1.2 ITHEKSTHI B – SIBONWA



- 1.2.1 Nawubuka lesibonwa yini lebaluleke kakhulu kute kukhicitwe lokudla lokukulesibonwa? (1)
- 1.2.2 Bhala bunye buhle bekudla lokudla lokungenhla. (1)
- 1.2.3 Bhala sitselo sinye losatiko kulesibonwa. (1)
- 1.2.4 Lemikhicito lengenhla isiphakamisa kanjani simo setemnotfo eveni? (1)
- 1.2.5 Khetsa imphendvulo lefanele.

Kufanele nakanjani kutsi lemikhicito idliwe ngulaba labalandzelako.

- A Labaganye kakhulu.  
 B Labaphile kahle.  
 C Labagula kakhulu.  
 D Labadla kakhulu.

(1)  
 [5]

**25 emamaki**

**SIGABA B SIFINYETO****UMBUTO 2**

Fundza lethekesthi bese uyayifinyeta ngemagama akho langabi ngetulu kwalange-70, uvete kutsi **tecwayiso tini letinikwa lusha lolusandza kuphotfula etikolweni nasemanyuvesi lolufuna umsebenti**. Sifinyeto sakho asibe ngendlela yetindzima letimumetse emaphuzu lasikhombisa.

**CAPHELA:**

- Lulwimi lwakho lungabi nemaphutsa kute ungalahlekelwa ngemamaki lamatsatfu elulwimi.
- Sebentisa timphawu tekubhala nekufundza.
- Bhala linani lemagama lowasebentisile ekugcineni kwesifinyeto sakho.

**ITHEKSTHI C****TECWAYISO LETINGASITA LUSHA UMA LUFUNA KUTFOLA UMSEBENTI**

Lucwaningo lutsi linyenti lwelusha lolunamatekuletjeni nalolugogodze emanyuvesi lunenkinga yekutfula imisebenti. Lolucwaningo lukhombisa kutsi kunetindlela tekuncoba lenkinga. Bacashi kufanele bente kutsi timo netidzingo temisebenti titfolakale kalula etinhlanganweni tabo kulabo labaphuma etikolweni nasemanyuvesi. Bacashi kufanele babe nelwati lolubanti nabacasha labanamatekuletjeni nalaba nalabasandza kucedza enyuvesi. Loku kusho kutsi lusha kufanele lube nelikhono lekubhala umlandvo wemphilo yalo letawuhambisana neticelo temisebenti.

Ngembi kwekufuna umsebenti labasandza kuphotfula tifundvo takamatekuletjeni netasenyuvesi bafanele bati umsebenti labawufunako. Ngetulu kwaloko bente lucwaningo lwetidzingo tenkampani labafuna kuyoyisebentela. Loku kubalulekile ngoba imvamisa yebacashi itsandza kucasha bantfu labanemakhono latawutfufukisa imisebenti yabo. Labo labasandza kuphotfula kufanele bati kutsi ngembi kwekucashwa kufanele babe nelwati lwenkhulumoluhlolo. Kufanele bati nekutsi lenkhulumo luhlolo icala ngalesikhatsi ungena nje emabaleni esikhungo labatewufuna kuso umsebenti. Bafanele betsembeke babuye batitfobe. Kucasha bantfu labasandza kuphotfula tifundvo tamatekuletjeni nasenyuvesi kunika inhlangano litfuba lelihle lekutfufukisa emakhono ebasebenti ngekutsi basebenti lesebanesikhatsi lesidze basebenta banikwe litfuba lekusita labo labasandza kuphotfula tifundvo tabo.

Lizinga lalabaphotfule matekuletjeni nasenyuvesi labafuna imisebenti lenyuka malanga onkhe, ngaloko kufanele kucatjangwe emasu ekunciphisa lelizinga. Loku kungentiwa ngekutsi kuvulwe tikhungo tekutfufukisa emakhono kute batfungatsimsebenti batitfolele letinye tindlela tekutfula imisebenti. Letikhungo titabasita kucondzisa kutsi bafanele babe neluhlelo lwemphilo yabo. Bafanele bati kutsi kuba semsebentini kusho kutsini etimphilweni tabo. Labaphotfule matekuletjeni babona imphilo ilichungechunge lwetigameko letibatsatsa tibabeke lapho bafuna khona. Nalabo labaphotfule emanyuvesi banenkinga lefanako, umehluko kutsi bona babona titifiketi tabo tibacinisekisa kubanika imisebenti. Lomcondvo wekutsi umuntfu losaphumelele matekuletjeni nalophotfule enyuvesi vele sewucashiwe, ngiwo lobangela kutsi bangasiboni sidzingo nekusebenta ngekutikhandla.

Labasandza kuphotfula matekuletjeni nasemanyuvesi bafanele bati indlela lekufanele batiphatse ngayo emisebentini. Kufanele bati kutsi bayahloba babuye bagcoke kahle nangabe

basemsebentini. Kufanele bafike ngesikhatsi babuye bahambe ngesikhatsi lesifanele emsebentini. Kufanele babe nemakhono ekuchumana nalabanye bantfu. Lokubaluleke kakhulu kutinikela emsebentini kunekufuna liholo lelisetulu. Lokunye lokubalulekile kutsi emakhononchanti kufanele afundziswe lokutawulungiselela labaphotfulile kubukana nemsebenti.

**10 emamaki**

**SIGABA C TINKONDLO****UMBUTO 3 INKONDLO LENGAKAFUNDVWA EKLASINI**

**CAPHELA:** Kuphokelele kutsi wonkhe lohlolwako awuphendvule lombuto.

Fundza lenkondlo bese uphendvula imibuto lelandzelako.

**MBHUBHISI – S.C. Msibi**

- 1 Wena mbhubhisi wesive
- 2 Bats' ungumashay' abhubhise
- 3 Ngob' usila njengembokodv' elitjeni,
- 4 Kutawuze kube nini mbhubhisi?
- 5 Ubatfumb' ubafaka kulomnyam' umgodzi
- 6 Ngetimphiko takho letigcwele lunya.
  
- 7 Ufika kungakalindzeli muntfu
- 8 Ufika kujatjuliwe ngetidladla takho
- 9 Letinyonyoba ngebunono belikati,
- 10 Ufika ubhubhise ngeludvonsi lwakho
- 11 Loluhlaba lungevakali,
- 12 May' usitsa sekuphila mbhubhisi!
  
- 13 Uhlasela ngetindlela letinyenti,
- 14 Ugadla ngetikhali letingabonwa
- 15 Ufik' ugadle kuvakale
- 16 Kulabo lesebalibele ngebucili bakho.
- 17 Awukhetsi bala lemuntfu nawugadla,
- 18 Ugadla kulomnyama nalomhlophe,
- 19 Ungamshiyi lomncane nalomdzala.
- 20 Takho tikhali atibonakali,
- 21 Kubonakala lapho sewugadle khona.
- 22 Waze waba nelunya mbhubhisindzini
  
- 23 Kulona lose umhlasele
- 24 Ukhala ngetilondz' emlonyeni
- 25 Abuye apha fwe lukhwekhwe,
- 26 Agcin' angasabon' emehlweni,
- 27 Lomunye bats' ungenwa lidloti
- 28 Kantsi wen' utifihi' engatini yakhe,
- 29 Ekugcinen' umtselel' utfulini,
- 30 Ugiy'ucephuk' utibone buchawe,
- 31 Hhawu ngawe mbhubhisi.

[Lalela Ngwane: 31]



- 3.1 Ngubani lombhubhisi loshiwo ngulenkondlo? (1)
- 3.2 Umugca wesitsatfu ucuketse hlobo luni lwesinongo? (1)
- 3.3 Nguluphi lolutfuli latselana kulo lombhubhisi, emgceni we-29? (1)
- 3.4 Nguyiphi lendlu lemnyama leshiwo ngusonkondlo? (1)
- 3.5 Ngabe ucinisile yini sonkondlo kutsi lombhubhisi akakhetsi bala lemuntfu? Sekela imphendvulo yakho. (2)
- 3.6 Bhala bunkondlo lobusemigceni we-10 ne we-11. Sekela imphendvulo yakho. (2)
- 3.7 Usho kutsini sonkondlo emgceni we-29? Chaza. (2)
- [10]**

**UMBUTO 4            TINKONDLO LETIFUNDVWE EKLASINI****EMAKHANGALA    C. TSABEDZE (UMHLELI)**

**Kulombuto kunemibuto lemibili, (4.1 na 4.2), khetsa MUNYE uphendvule ngawo.**

4.1      Fundza lenkondlo bese uphendvula imibuto lelandzelako.

**IWIL' INSIKA – J.J. Tfwala**

- 1        Yeka leto tikhatsi
- 2        Letendlula letingenawuphindze tibuye:
- 3        Tendlulise kwemanti lageletako
- 4        Tendlulise kwemphilo yesotsamlilo
- 5        Lenemabanga lamafisha njalo
- 6        Lendlul' ingab' isakhonjwa ndzawo.
  
- 7        O! nkhosikati yelikhaya,
- 8        Bekukuhl' usime ngensika,
- 9        Bekukuhl' unemtfunti wekukhosela,
- 10      Kubuhlungu kuyashacisa lamuhla,
- 11      Sililo setinyembeti sodvwana.
  
- 12      Yebo-ke, awehl' umoya ...
- 13      Insika lebeyimise lelikhaya
- 14      Kusakela kwatsi **nhlo**,
- 15      Idliwe ngumuhlwa yawa,
- 16      Kayiphindz' ivuke nanini.
  
- 17      Kuyobuye kulunge, cola ...
- 18      Nob' emanceb' opha,
- 19      Nobe tilondza tibhibha,
- 20      Nom' iminjunju ifutsa,
- 21      Kulukhuni kulitje kuwe,
- 22      Cola ... cola ... cola ...
- 23      Emehlwen' akho kuyakwakheka
- 24      Emachaphoti lakhokha tinyembeti,
- 25      Buso bakho lobubusheleleti
- 26      Buvele tsihla letingahhudluleki,
- 27      **Boph'** inhlitiyo ngam**mabopha**.
  
- 28      Bamb' inhlitiyo uyibambisise,
- 29      Landzel' umgudvu lofanele,
- 30      Tifanise nalabanye bantfu.
- 31      Kwemhlaba kuyendlula Mntfwanebantfu,
- 32      Lokwentekile kuyafana nalokwadalwa

- 4.1.1 Bhala umoya lofikele sonkondlo nabhala lenkondlo. (1)
- 4.1.2 Bhala ligama lesinongo lesisemgceni we-3. (1)
- 4.1.3 Letikhatsi lakhuluma ngato sonkondlo ngutiphi? (1)
- 4.1.4 Ngabe sonkondlo ulisebentise kahle yini leligama lemtfunti emgceni we-9? Sekela imphendvulo yakho. (2)
- 4.1.5 Lomuhlwa umeleni lapha kulenkondlo? Chaza. (2)
- 4.1.6 Bhala ligama lelakha luchumano emigceni we-3 na -4. (1)
- 4.1.7 Sinongo sini lesisemgceni we-28? Usho kutsini sonkondlo ngalesinongo? (2)
- 4.1.8 Ngutiphi letilondza letishiwo ngusonkondlo emgceni we-19? (2)
- 4.1.9 Bunkondlo buni lobusemgceni wekugcina endzimeni ye-4? (2)
- 4.1.10 Chaza kutsi sonkondlo ushoni emgceni 8. (2)
- 4.1.11 Lesentakutsi lesidvwetjelwe emgceni we-14 ngabe sishe kutsini? (2)
- 4.1.12 Uchazani sonkondlo ngalesinongo senkhulumo lesisemgceni we-21? (2)
- [20]**

**NOBE**

## 4.2 Fundza lenkondlo bese uphendvula imibuto lelandzelako.

**NGIPH' INDLEBE – J.J. Tfwala**

1 Mntfwana losakhula  
 2 Vani mine ngiyakuhlebela  
 3 Ngobe kuphuphuma lutsandvo  
 4 Ekhats' enhlityweni yami:  
 5 Cela kukhonjiswa' indlela  
 6 Ngulabadzala kunawe ngeminyaka,  
 7 Nalabadzala kunawe ngengcondvo  
 8 Imphilo yasemhlaben' iyamangalisa  
 9 Ngekucwebetela buhle besikhashana  
 10 Lobugcama butsats' emehlo,  
 11 Kants' abumi buyendlula  
 12 Bufana nemanti lageletako.

13 Mntfwana losakhula  
 14 Usibane sakusasa  
 15 Lesiyokhanyisela labetako  
 16 Balandzele kwakho kukhanya;  
 17 Kukhanya kwetindlela takho  
 18 Kubadvose kubahole njalo,  
 19 Nabo bakhwebe labanye.  
 20 Yembats' ingubo yenhlakanipho  
 21 Ulalele tiyalo ngekucophelela,  
 22 Utsatse tinyatselo letifanele,  
 23 Ngesikhatsi lesifanele,  
 24 Endzaweni lefanele.

25 Mntfwana losakhula  
 26 Dvumis' uMvelinchanti  
 27 Nguye sisekelo semphilo  
 28 Nguye lonemandl' ekwenta  
 29 Konkhe lokungaphasi kwemtfunti  
 30 Welilanga, nguye logiya kugiyeye  
 31 Nobe labanye behluleka kugiya,  
 32 Nguy' umtfombo wemphilo  
 33 Logeleta njengemant' emfula  
 34 Nguye litiko letemitsetfo,  
 35 Temphilo, telwati netebulungiswa;  
 36 Onkh' emandl' akuYe yedvwa.

- 4.2.1 Sonkondlo ukholelwa kuyiphi inkholo nasibuka lenkondlo? Khetsa yinye imphendvulo:
- A Emadloti.
- B BuKhrestu. (1)
- 4.2.2 Yini lebanga sonkondlo kutsi acele kuphiwa indlebe? (1)
- 4.2.3 Yindlela leyaphi lena lakhuluma ngayo sonkondlo? (1)
- 4.2.4 Ushoni sonkondlo emgceni we-22? (1)
- 4.2.5 Utsi sonkondlo yini lokubili lokubukwako kute kutsiwe umuntfu ukhulile? (2)
- 4.2.6 Bhala bunkondlo lobakhiwa ngulencenye ledvwetjelwe, emgceni we-35. (2)
- 4.2.7 Ngabe sonkondlo uphumelele yini kusebentisa imphindvwa kulenkondlo yakhe? Sekela imphendvulo yakho. (2)
- 4.2.8 Sifundvo sini lasiniketa sona sonkondlo endzimeni yekugcina? (2)
- 4.2.9 Khetsa imphendvulo lefanele ngalomusho wasonkondlo:
- Utsatse tinyatselo letifanele.
- A Unyatsele kahle ungawi.
- B Unyatsele lapho kufanele khona.
- C Ukhetsa imphilo lefanele.
- D Ubale tinyatselo letifanele. (2)
- 4.2.10 Bhala timbili tibonelo tebhule bemhlaba lobengca njengemanti lageletako. (2)
- 4.2.11 Bhala bunkondlo lobubili lobutfolakala emigceni we-11 na 12. (2)
- 4.2.12 Chaza lokushiwo ngusonkondlo emgceni 20. (2)

**[20]****30 emamaki**

**SIGABA D TAKHI NETIMISO TEKUSETJENTISWA KWELULWIMI****UMBUTO 5****5.1 Fundza lethekesthi bese uphendvula imibuto lelandzelako.**

Ngakusasa batsi bavuka balungisela kuya emsebentini, naLushawulo wavuka walungisa, kodvwa yena abengayi emsebentini, yakhe indlela yayicondze emabhasini. Yebo, Lushawulo abehamba, kodvwa abengati kutsi utawutsi nakefika emabhasini agibele leyaphi. Lapho nakefika abambe siphil sitimela esiteshini semabhasi awakhandza advunuselene, ingcondvo yakhe yasebentisa kwesambane. Wavele watitjela kutsi akabambe ibhasi leya kaloliwe. Kutsi-ke nakefika embili kwakuyawukhanya khona asefikile. Kuhamba kwakhe kwakulukhuni.

Isagudvuta ibhasi bantfu bonkhe bebaticocela leta nalete tindzaba. Lushawulo yena abelwa nemicabango leyayiphikisana engcondvweni yakhe, waphumisela watsi, "Ingabe ngitawufika yini lapho ngiya khona?" Kwakume tindzawo letimbili embikwakhe, lenye beyitsi akaye eThekwini lenye itsi aye eJozi. Kwakutsi lapho acatsanisa letindzawo letimbili netindzaba lahlala eva ngato, wagcina ancume kubamba lebheke enhla kaNdongaziyaduma, eJozi. Nanobe abengamange alubhadze eJozi, kodvwa watitjela nje kutsi ngeke alahleke emini libalele ngobe bantfu bakhona latawubuta kubo.

Bonkhe labehla emabhasini nasetitimeleni bavama kuba nemicicimba nje sonkhe sikhatsi. Nobe-ke kungasesiwo umtfwalo lomkhulu lowo kodvwa aphantse sikhwama-ke lokungenani. Umuntfu lohamba angakaphatsi lutfo akakavami, ngaphandle kwalabo labo labaphila njengetimbungulu. Ingani phela bagibela sitimela sihamba baphindze behle sihamba nasebawentile umsebenti wabo webumnyama. Lushawulo abefana nalabo bantfu ngobe kute lutfo labeluphetse. Nasekulaleni nje wasale wetsemba kutsi kusehlobo, ingubo ayinawo nalomncane umsebenti.

Kwatsi lapho kwehliwa ePitelitifu, Lushawulo naye walandzela labo lababeyawutsenga emathikithi esitimela. Linyenti labo labebaya emsebentini abatihluphanga ngemathikithi ngobe vele bebanawo, kantsi umsebenti ubalindzile edolobheni. Akubanga sikhatsi lesidze befikile, sachamuka sitimela lesibange eJozi. Akabanga nayo inkinga ngobe logadza abemile, amemeta abe akhweba nangetandla.

**5.1.1 Bhala kutsi lelibito lelidvwetjelwe lingumfutiselo waliphi libito.**

Kutsi utawubamba siphil sitimela kutawukhanya embili. (1)

**5.1.2 Bhala libito lelingumcondvofana nalelidvwetjelwe kulomusho lolandzelako.**

Isagudvuta ibhasi bantfu bonkhe bebaticocela leto naleta tindzaba. (1)

**5.1.3 Libito lini leli lelidvwetjelwe kulomusho lolandzelako?**

Lushawulo yena abelwa nemicabango. (1)

5.1.4 Shano kutsi hlobo luni lwetabito lolu lolulandzelako.

**Bonkhe** labehla ebhasini bavame kutfwala imicicimba yetikhwama. (1)

5.1.5 Shano kutsi letijobelelo letidvwetjelwe tatiphi timphambosi nekutsi tinika wuphi umcondvo kuletento letikuto, kulemisho lelandzelako.

(a) Bavuka balungisela kuya emsebentini. (2)

(b) Emasela aphilisa kwetimbungulu. (2)

5.1.6 Bhala lomusho ube yinkhulumombiko. Cala ngekutsi, Lushawulo utsi ...

"Ingabe ngitawufika yini lapho ngiya khona." (2)

5.1.7 Endzimeni yekucala, tsatsa **LIBITO** linye lelingumfakela wakhe ngalo umusho. (2)

5.1.8 Bhala lomusho lolandzelako ngendlela levumako.

Akubanga sikhatsi lesidze befikile. (2)

5.1.9 Bhala umsebenti wesabito selucobo kulemisho lelandzelako.

(a) Lushawulo yena akati lapho aya khona. (1)

(b) Yena Lushawulo ngeke alahleke. (1)

5.1.10 Hlobo luni lwetindlela tesento leti letilandzelako?

(a) Logadza umemeta akhwebe nangetandla. (1)

(b) Kuhamba kwakhe kwakulukhuni. (1)

5.1.11 Akha umusho ngelibito lelidvwetjelwe endzimeni yekugcina, libe nenshokutsi lehlukile kulena lesetheksthini. (2)

**[20]**

5.2 Lungisa emaphutsa elulwimi, lupelomagama, timphawu tekufundza nekubhala.

5.2.1 Hamba ke tfombatana usikhontele ekhaya. (1)

5.2.2 Hholohholo lamuhla sitawulala sidlile nebakitsi. (1)

5.2.3 Ingabe labosidlani bagcine baboshiwe yini. (1)

5.2.4 Lamamba ubophe inyandza yetinkhuni letimanti. (1)

5.2.5 Bonke bafundzi bafuneka ehholweni. (1)

**[5]**

**UMBUTO 6**

Buka lekhathuni bese uphendvula imibuto lelandzelako.

		
<p>1. Maye kuba ngumfati! Ubukelwa live phasi njalo. <b><u>Kakhulukati bantfu labadvuna, abasiboni kutsi siyini tsine bafati.</u></b></p>	<p>2. Lomntfwana umangele ngekulwa kwebatali bakhe. Uyise ukhuluma embhobheni. "Hlonipha lomfana wami ngobe uyambona kutsi <b><u>usibindzi.</u></b>"</p>	<p>3. Yewena mfati ndzini. Ngitaku ... kambe wetsembe emaphoyisa?</p>

- 6.1 Ngabe umoya walomndeni unemphilo lenjani nawubuka sitfombe 3? (1)
- 6.2 Lomake wetsembeni njengobe akhuluma ngalendlela esitfombeni 1? (1)
- 6.3 Hlobo luni lwenkhulumo lolu loludvwetjelwe esitfombeni 1 kulekhathuni? (2)
- 6.4 Bhala umusho lonelovelomagama esitfombeni 3. (2)
- 6.5 Tsatsa lelibito lelidvwetjelwe esitfombeni 2 wakhe ngalo umusho, linike inshokutsi lehlukile kunaleyo lekulekhathuni. (2)
- 6.6 Ucabanga kutsi yini lebangela kutsi lomfana angangeni kulemphi yebatali bakhe? (2)

[10]

**35 emamaki**

**Samba: 100 emamaki**